

Flu Buruang

Contributed by Muhammad Dafiq Saib
Friday, 22 July 2005

Assalaamu'alaikum wa rahmatullaahi wa barakaatuhu

Katiko ambo ketek-ketek saisuak, nenek ambo sangaik bana bangih baliu kalau kami makan barimah, bakapantiangan nasi ka lapiak (kami saisuak tu makan baselo di lapiak). 'Sataun mangko, ka pulang no go dek kalian, kalian pasando-sandoan sin no. Manangihno, mangaduno ka Tuhan Allah, bangih Tuhan Allah ka awak. Jaan kalian pasando-sandoan tu nasi. Kalian pakecai-an, biko tacampak no jadi sarok. Badoso awak, lai jaleh dek kalian. Indak buliah makan barimah-rimah.' Sarupo itu biasono baliu mambangih-i kami, sabagai pandidikan ka kami nan ketek-ketek supaya baraja kameh jo imaik, indak mubasia, indak mambuang-buang nasi.

Kalau ado kajadian nan agak di lua daripado nan biasa, dek baliu diambiak pulo untuak bahan maajai kami. Misalno, katiko gunuang Marapi nan talatak sabalah ka mudiak dari rumah kami mangalua-an asok, malatuih, baliu mangecek-an, 'Aa itu paringatan Tuhan Allah. Jaan kalian buruak laku juo, nan kamanjadian bangih Tuhan Allah,' baitu jano baliu.

Katiko ketek-ketek tu, kami iyo agak jaek-jaek. Ado 'pamainan' kami nan sangaik bana bangih nenek ambo tu mancaliak, yoitu maadu ayam. Di kami katuju bana mancaliak ayam balagotu, sampai salah ciek kalah. Biasono, kami bao ayam jantan, pai kami kalua masuk kampuang, mancarian lawan ayam. Kalau basuo, kami ampok-an ayam jantan nan alah digili-gili saketek. Basabuanglah ayam tu agak sajamang, kalaupun indak sampai ado nan kalah, malakik urang nan punyo ayam kalua manyumpah-nyumpah, bangih. Enek ambo biasa mangecek-an, 'Isuak, di ari kiamaik, kalian nan tukang adu ayam tu ka diaduno di ayam, sampai badarah-darah sarupo ayam nan kalian adu,' jano baliu. Katiko ado di antaro kami nan manjawab, 'Kan indak baa bagai du du nek, nak balatiah ayam tu saketek balago.' Baliu jawab, 'Wak-ang diaduno di urang, bacakak sampai ba kalukoan lai amuah ang? Aa baitu pulo di ayam tu, sakik dino. Indak buliah sarupo itu awak ka binatang. Binatangtu musti lo disayangi, nak jaleh bana di kalian,' kecek baliu.

Kato-kato baliuauko tatap juo tangiang-ngiang di ambo sampai kini. 'Binatang tu musti disayangi....'

Sadiah bana ambo mancaliak urang mambao ayam bapuluah ikua, bakabek, sudah itu bagantuangan di bagasi sapeda motor. Panah nampak di ambo katiko sapeda motor tu baranti di lampu merah, ado ayam tu nan ampia mati dek mairuik asok knalpot. Pamandangan sarupoko, tiok ari nampak dan indak ado urang nan maraso bahaso itu sabuah 'kajahatan' taradok ayam-ayam nan malang tu. Takana-kana di ambo kecek enek ambo saisuak, 'bangih Tuhan Allah ka awak kalau awak buruak laku tu.' Antah baa, saraso iyo sedang bangih Tuhan Allah tampak di ambo, jo caro mandatangkan panyakik flu buruang, malalui ayam-ayam nan tiok ari 'awak' aniayo jo indak manaruah sayang saketek juo ka binatang ketek nan malang tu.

Wassalaamu 'alaikum wa rahmatullaahi wa barakaatuhu

Lembang Alam